



Inatsisartunut ilaasortaq Naaja Nathanielsen, Inuit Ataqtigiit  
MAANI

### § 37 naapertorlugu apeqqummut nr. 2012-075-imut akissuteqaat

Inatsisartut suleriaasianni § 37 imm. 1 naapertorlugu Naalakkersuisunut makkuninnga apeqquteqarputit.

#### Tunggavilersuut:

Apeqquteqaat novemberimi 2011-imi Naalakkersuisut Inatsisartunut aatsitassat pillugit isumasioqatigisitsineranniit malittaavoq. Isumasioqatigiinnermi ilisimasitsissutigineqarpoq Naalakkersuisut aatsitassanik piiaanermut atatillugu aningaasatigut nunap pissarsiassaannut ilusiliineq ujaqqanut erlinnartunut tunngatillugu allanngortitsinialersaartut, soorlu aamma aqutsinermi nakkutilliinerup ilusissaanik pisariaqartunik atortuulersitsiniarnerit piiaanermut annissuinissamullu tunngasut piareersarneqartut.

Naalakkersuisut Inatsisartunut nassuiaataanni 2011-imeersumi allaqqavoq Naalakkersuisut piumasaqarniartut qanoq rubin-inik safir-inillu suliarinninnek tuniniaasarnerlu ingerlanneqassasoq, taamaaliornikkummi akileraarutit akitsuutillu nalunaarsorneqarlutillu akilernerqareerpata tuniniaanermi akit eqqortut qulakkeerneqassammata.

**Ujaqqanik erlinnartunik, soorlu aligoqqinnik, rubininik safirinillu aatsitassanik piiaanermut atatillugu aningaasatigut nunap pissarsiassaannut ilusiliineq maannakkut atuuttup allanngortinniarnanum Naalakkersuisut eqqarsaatersornermikkut sumut killippat?**

#### Akissut:

Aningaasatigut nunap pissarsiassaannut (Government Take-mut) ilusiliamik inerisaaneq, illuatungaani Kalaallit Nunaata aatsitassarsiorfiutileqatigiiffiit aningaasaliinerannit annertunerpaamik pissarsiaqarnissaata qulakkeernissaata, illuatungaani aatsitassarsiorfiutileqatigiiffiit Kalaallit Nunaanni aningaasaleerusussuseqartikkunnaarsillugit aatsitassarsiorfiutileqatigiiffinnut piumasaqaatit annertuallaannginnissaasa, akornanni oqimaaqatigiisinniagassavoq.

Naalakkersuisut ujaqqanut erlinnartunut akileraaruseeriaatsimik immikkut ittumik atuutsitsilernissamik pilersaaruteqarput.

Ilusiliaq nunani tamalaani nunanik sanillussilluni misissueqqissaarnernik aallaaveqartoq suliarineqaleruttorpoq. Ujaqqanut erlinnartunut akileraarusersueriaatsimik allannguinissamik siunnersuut 2012-imi inaarsarneqassaaq.

**Ujaqqat erlinnartut piiaarneqarnerannut atatillugu tuniniaanissamut, silineqarnerannut nakkutigineqarnerannullu Naalakkersuisut qanoq eqqarsaatersuuteqarpat?**

23. mar 2012  
Sagsnr. 2012-060499  
Dok. Nr. 849270

Postboks 1601  
3900 Nuuk  
Tlf. (+299) 34 50 00  
Fax (+299) 32 56 00  
E-mail: isiin@nanoq.gl  
www.nanoq.gl

### **Tuniniaasarneq**

Periaatsinik arlalinnik atuilluni ujaqqanik erlinnartunik tuniniaasoqarsinnaavoq, kisiannili periaatsit marluk ingerlatseqatigiiffinit atornerqarnerusarput. Periaatsip aappaa tassaavoq pisisartumut aalajangersimasumut tunisisarneq, periaatsillu aappaa tassaavoq ujaqqanik erlinnartunik kaattaassilluni tuniniaasarfinni tuniniaasarneq. Periaatsit marluk tamarmik misilittarneqassasut isumaliutersuutigineqarpoq. Tunisanut kisitsisit tamarmik allatorneqartarput aammalu akit ineriartornerat, tuniniaanermi periaaseq eqqarsaatigalugu oqartussaasunit akuttunngitsunik nalilersorneqartarluni.

### **Silisisarneq**

Ujaqqat erlinnartut pitsaassusaanni tamaginni taassuma ilaa siumut aalajangeriigaq, ujaqqamut silineqareersimasumut aamma suliarineqanngitsumut akilersitsisoqartussanngorlugu silineqartassasoq piumasaqaataavoq. Akit ineriartornerat aammalu ujaqqap silineqareersimasup aamma suliarineqanngitsup akiisa akornanni akit assigiinngissutaat ingerlaavartumik oqartussaasunit nalilersorneqartarpoq. Tamatumani siunertarineqarpoq, ujaqqat suut silineqareersimasut aammalu suliarineqanngitsut tunineqartassanersut piumasaqaateqarnissaq, taamaalillunilu Kalaallit Nunaata Government Take-nit pissarsiassai annertusarneqassallutik.

### **Nakkutillineq**

Ujaqqat erlinnartut sumiissusersisarsinnaanissaannut qarasaasiakkut nalunaarsuiffimmik (Ruby-Track) suliaqartoqarpoq. Qarasaasiakkut nalunaarsuiffik pitsaassutsimik misissuiffittaqarluni<sup>1</sup> misilerarneqarfissaminut killiffeqarpoq. Qarasaasiakkut nalunaarsuiffeqalernerme ujaqqat erlinnartut tunisassiarineqarnerannit, assartorneqarnerannit, avissaartiterineqarnerannit, immikkoortiterneqarnerannit, salineqarnerannit, silineqarnerannit tunineqarnerannullu qanorluunniit suliarineqarnerata ingerlanerani killiffeqarnerasoq malinnaaffigineqarsinnaalissapput. Ruby-Track-imi periaatsimi piffissap qanoq ilinerani sukkuullunniit, assersuutigalugu toqqorsivimmuut ilineqarnera, akuersissummik allagartalerneqarnera, normui, tunisassiarineqarnera, tunineqarnera il.il. pillugit nalunaarusiaq pappialanngortillugu anillatsinneqarsinnaavoq.

Aatsitassarsiorfimmi ornigulluni nakkutillineq, Nuummi laboratoriamut assartuineq aammalu laboratoriami misissuineq assiliivimmik alapernaarsuittisinnikkut pigaartumi nakkutilliisoqarnikkullu ingerlanneqartarpoq. Laboratoriani sulisunut allagartalerneqarsimasunut immikkut ittumik suliassanik suliaqartunut, soorlu ujaqqanik erlinnartunik immikkoortiterinermik, taamaallaat killilimmik isertoqarsinnaavoq. Nakkutilleeriaatsimi aamma ujaqqanik erlinnartunik laboratoriamut eqqunneqartunik imaluunniit anninneqartunik oqimaalutaanerit tamarmik ilaatinneqarput. Laboratoriat isumannaallisaanermut killeqarfinni agguataagaapput, taamaalilluni sulisut aalajangersimasut kisimik isumannaallisaanermut killeqarfinni pineqartuni isersinnaallutik.

**laallit Nunaanni aatsitassarsiorneq pillugu Naalakkersuisut Inatsisartunut nassuiaataanni 2011-imeersumi ujaqqat erlinnartut pillugit suliniutit marluk taaneqarput. Manna tikillugu allanik suliniutinik ingerlatsisoqarpa aammalu ujaqqat erlinnartut sorliit taakkunani pineqarpat? Ujaqqanillu erlinnartunik suliniutit tamarmik paaanissamik qinnuteqarfigineqartussat sumut killiffeqarpat?**

### **Akissut:**

Maannakkorpiag Qeqertarsuatsiaat eqqaanni True North Gems Inc-ip saniatigut suliassanik ujaqqanik erlinnartunik akuutitsiviusunik aammalu paaanissamik qinnuteqarnissamut qanillisimasunik soqanngilaq. Suliassat allat ujaqqanik erlinnartunik

---

<sup>1</sup> Qeqertarsuatsiaani rubin-inik safir-inillu True North Gems-ip aammalu Hudson Resources Inc-ip Kangerlussuarmi aligoqqinnik paaaniamerat.

peqarneranik paasisaqarfiusimasut tamarmik misissuinerup immikkoortuanut killiffeqarput. Suliassani taakkunani diamanteqarfeqarsinnaaneraniq misissuineq ingerlanneqarpoq. Tassani pineqarput ingerlatseqatigiiffiit Avannaa Exploration Ltd., NunaMinerals A/S, IceFire Diamonds AS, Intex Resources ASA aamma Hudson Resources Inc.

Inussiarnersumik inuulluaqqusillunga

A handwritten signature in black ink, appearing to read 'Ove Karl Berthelsen', with a large, sweeping flourish at the end.

Ove Karl Berthelsen